



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LEKUCALA (P1)

LWETI 2016

EMAMAKI: 80

SIKHATSI: Ema-awa 2

Leliphepha linemakhasi la-13.

TICONDZISO KULABAHOLWAKO

1. Leliphepha lehlukaniswe TIGABA LETINTSATFU:

SIGABA A:	Sivisiso	(30)
SIGABA B:	Sifinyeto	(10)
SIGABA C:	Takhi netimiso tekusetjentiswa kwelulwimi	(40)
2. Phendvula YONKHE imibuto ngeSiswati.
3. Cala LESO NALESO SIGABA ekhansi LELISHA.
4. Dwebela ekugcineni kwaleso NALESO SIGABA.
5. Tinombolo tetimphendvulo atihambisane naleto letisephepheni lemibuto njengobe tinjalo.
6. Shiya umugca emkhatsini wetimphendvulo takho.
7. Caphelisia sipelingi/lupelomagama nendlela lewakha ngayo imisho.
8. Kwehlukaniswa kwesikhatsi:

SIGABA A:	Emaminithi 50
SIGABA B:	Emaminithi 30
SIGABA C:	Emaminithi 40
9. Bhala ngebunono nangesandla lesifundzekako.

SIGABA A: SIVISO**UMBUTO 1**

1.1 Fundza leteksthi lelandzelako bese uphendvula imibuto letawulandzela.

ITHEKSTHI A**KUBALULEKA KWEKULALELA IMIYALO YEBATALI**

- | | | |
|---|---|----------------|
| 1 | Mine naTsembani longudzadzewetfu lomkhulu sikhuliswe batali lebebasinika imiyalo lemihle ngaso sonkhe sikhatsi. Bebye basitjele kutsi bantswana bafuna kutiphatsa bente lokufunwa ngibo. Bacabange kutsi batali bayabagcilara nangabe babanika imiyalo futsi bentiva kungaphucuki. Bakhohlwe kutsi indlela ibutwa kulabayatiko. Babewetfu abevele ayibeke ngesihloko kutsi bantswana basola batali babo nangabe sebahlangene nabontsanga yabo. Kepha nawulandzela letinsolo tabo utawubona kutsi batali benta lokufanele bakwente emntfwaneni wabo kute akhule abe ngumuntfu lokwatiko kumelana nato tonkhe timo temphilo. Tintfo letibatfokotisako bantswana ngalesinye sikhatsi tishayisana naleto letilindzelwe batali kubo. Kuba mnandzi kubatali nangabe bantswana bakhombisa inhloniphonekubalalela etintfweni letinhle naletitabaphumeleisa emphilweni. Kutsiwa umntfwanana longalaleli ulihlazo kubatali ngisho nasemmangweni wonkhana. | 5
10
15 |
| 2 | Nembala sengiyabona kutsi bacinisile batali betfu nangabe basinika imiyalo basho nekutsi live liyahlonishwa. Babuye batsi ihlonipha nalapho ingayukwendzela khona. Asubuke nangu dzadzewetfu Tsembani, indlela batali betfu lebebamyala ngayo! Kube walalela nangabe lomuhla akasinje. Bekabonakala angulomuntfu lokhohlwa umyalo lotsi: 'Hlonipha uyihihlo nenyoko kute tinsuku takho tandze eveni.' Lomuhla sewehluleka nekuvuka. Baphi labangani bakhe labegijima nabo busuku nemini? Abengabambeki, ashayela etulu futsi angahloniphi muntfu. Imoto lenelivili emuva sacala kuyibona ngaye leyafika nemajaha lamatsatfu ilandze yena nebanganibakhe kulenzawo. Buphi lotjwala lobabugcwala emabhuthini ubatfole sebavulele umsindvo utsi mpu lapha enkhundleni yetemidlalo ngalapha babe banatsa tjwala. Bebatsi bangamemetela emsakatweni kutsi enkhundleni yetemidlalo kunemcimbi lotsite babe babasitile. Batawuchamuka ibhuthi igcwele ngetjwala ngatsi bavele babutsa nje kantsi babutsengile. Leyomoto beyigcina seiyinkhundla yetibukeli. Ha! Umhlaba uyahlabu! Nje nguye umntfwanamake Tsembani lo? | 20
25
30 |
| 3 | Lokusuke kube buhlungu kakhlulu kutsi Tsembani yena wavele washiya phasi sikolo, wabona sengatsi uyabambeleka ngekuya esikolweni. Bangani bakhe boSindi naPhelele bachubeka nanobe bebaganga nje kodvwa kuyasho kutsi imiyalo yebatali yayingasuki etingcondvweni tabo. Buka nje lomuhla Sindi unguabhalane lapha emahhovisi akaMasipala, uphila kamnandzi uhamba ngemoto yeluhlobo loluphambili. | 35 |

4	Phelele yena usebentela lapha kadokotela Nhlabatsi, yena wemukela tigulane, akufani nekuhlala. Utimelie futsi uyakwati kutentela tintfo latitsandzako futsi ugcoka timphahla takanokusho. Tsembani sekumvisa buhlungu nangabe simpheleketela lapha kadokotela kubona lona labengumngani wakhe angasayingeni yakhe. Ute angasafuni nekuya kadokotela waPhelele ngobe nangabe efika khona kugula kumcindzetela ngemandla ate ashaywe naliphika. Akucondzakali kutsi yini imbangela yaloko. Kungenteka kutsi wentiwa kucabanga kakhulu ngelikusasa lakhe lewatibulalela lona nangabe sekabona bangani bakhe baphumelela. BoSindi naPhelele setamile kubakhulumisa ngalesento sabo sekungamnaki umngani wabo kodvwa batsi abanasikhatsi sekumvakashela ngobe bashayisa sekwedlule sikhatsi emsebentini kantsi ngeMigcibelo bayawasha ba-ayine, ngeMasontfo baya etinkonzweni.	40 45 50
5	Emajaha wona akasabonwa nangemehlo ahambile netimoto tawo. Abete kubo ngenhoso letsite. Sewahlala ayedvwa umntfwanamake ngesimanga sekungalaleli. Nangabe tintfo tisakuhambeli kahle uba nebangani labanyeti, kodvwa nasetingakuhambeli kahle bangani bayakubalekela.	55

[Itsetfwe encwadzini Giya Ngigiye, likhasi 24]

- 1.1.1 Khetsa YINYE imphendvulo. Ngulonjani umuntfu longuntsanga yakho?
- A Ngulolingana naye ngemtimba.
 - B Ngulolingana naye ngebudze.
 - C Ngulolingana naye ngeminyaka.
 - D Ngulolingana naye ngemfundvo.
- (1)
- 1.1.2 Kusho kutsini kutsi indlela ibutwa kulabayatiko? (1)
- 1.1.3 Nguliphi litiko lelisetjentelwa nguPhelele? (1)
- 1.1.4 Yini leyaba buhlungu kakhulu leyentiwa nguTsembani? (1)
- 1.1.5 Nguwuphi umyalo lokuletheksthi lengenhla lophatselene nekutsi nawuwugcina utawuphila sikhatsi lesidze? (2)
- 1.1.6 Ngukuphi lokumnandzi lokutsandvwa batali ebantfwaneni babo? Bhala KUBILI. (2)
- 1.1.7 Bhala tintfo LETIMBILI letikhomba kutsi Tsembani bekangayinakekeli imphilo yakhe. (2)
- 1.1.8 Bhala KUBILI lokucatjangwa bantfwana nangabe batali babanika imiyalo. (2)
- 1.1.9 Bekubangwa yini kutsi Tsembani angafuni kuya kadokotela lapho kusebenta khona Phelele? Bhala KUBILI. (2)

- 1.1.10 Chaza kutsi isho kutsini lenkhulomo lets: 'Lomuhla sewehluleka nekuvuka?' Bhala emaphuzu LAMABILI. (2)
- 1.1.11 Bhala tintfo LETIMBILI letenta boSindi naPhelele bangamvakasheli Tsembani. (2)
- 1.1.12 Bhala saga lesikuletheksthi lengenhla lesinalenchazelo lets, hlonipha wonkhe umuntfu ngobe awutati kutsi uyophelelaphi, usho kutsi sibhekiswe kubani. (2)
- 1.1.13 Kungumbono nobe kuliciniso kutsi nangabe tintfo tisakuhambelo kahle uba nebangani labanyeti, kodwua tingakuhambelo kabi bangani bayakubalekela? Sekela imphendvulo yakho. (2)
- 1.1.14 Nangabe bewungudzadze waTsembani bewungamcosha yini ngalemphilo lebekayiphila? Sekela imphendvulo yakho. (2)

1.2 Fundzisa lesifombe bese uphendvula imibuto letawulandzela.

ITHEKSTHI B



[Itsefwe ku-Bona, Inhlaba 2013, Likhasi 25]

- 1.2.1 Khetsa KUNYE kuloku lokulandzelako. Nangabe ubuka lomndeni kulesibonwa lesingenhla ukhombisani emphilweni?
- A Ukhombisa kuvelana.
 - B Ukhombisa kujabula.
 - C Ukhombisa kwekhutana.
 - D Ukhombisa kungevani. (1)

- 1.2.2 Yini lena leyenteka kulesibonwa lesingenhla? (1)
- 1.2.3 Nika KUBILI lokukhombisa kutsi labantfu labakulesibonwa baphila kahle. (2)
- 1.2.4 Loku lokwenteka kulesibonwa kuvame kwenteka kuphi nendzawo ngaphandle kwasekhaya? Bhala KUBILI. (2)

SAMBA SESIGABA A: **30**

SIGABA B: SIFINYETO**UMBUTO 2**

Fundza letheksthi lelandzelako bese ubhala emaphuzu lasikhombisa laveta **kongiwa kwemanti**.

TICONDZISO

1. Bhala emaphuzu LASIKHOMBISA ngemisho legcwele ngemagama LANGENGCI kula-60.
2. Imisho yakho ayibe netinombolo kusuka ku-1 kuya ku-7.
3. Bhala liphuzu LINYE emshweni ngamunye.
4. Sebentisa emagama AKHO.
5. Khombisa linani lemagenta lowasebentisile ekugcineni kwesifinyeto uwafake kubakaki.

ITHEKSTHI C**KONGIWA KWEMANTI**

Kongiwa kwemanti kufanele kube yincenyemphilo yebantfu baseNingizimu Afrika. Somiso sibhokile njengobe imifula seyishe kwasala isanti ngenca yenkinga yekwesweleka kwemanti eveni lakitsi. Tinyenti-ke tintfo letingentiwa bantfu kute babe ngulabon labonga emanti ngalesikhatsi lesimatima kangaka.

Kuhle kugcina libhodlela lemanti labandzako efrijini kute ubalekele kuvula impompi sikhatsi lesidze kutsi emanti aze aphole bese uyanatsa. Manyenti emalitha lalahlekako nangabe uvulela emanti kuze utfole labandzako.

Nangabe umuntfu awasha tindishi, angavuli emanti agelete nakatiyakata. Lokuncono akagcwaliise izinki yinye ngemanti ekuwasha bese lenye ufaka emanti ekutiyakata. Ungatfolakali uwasha tindishi ngayinye kodywa ube uvulele emanti ngebunyenti empompini.

Kumele bantfu batejwayete kuhlola emamitha abo emanti kubona kutsi kute emaphayiphi emanti lavutako. Emaphayiphi ekutselela emanti kubalulekile kutsi avalwe tonkhe tikhala letikhipha emanti. Emavelufu nawo kumele acinisekiswe kutsi akakhiphi emanti ngalokungakafaneli.

Kubalulekile kusebentisa umtsanyelo nangabe uhlanta libala lakho kunekutsi usebentise liphayiphi lemanti. Libala lelinemathayilisi nobe lelipheyiviwe alingatsanyelwa ngeliphayiphi lemanti, kuhle kutsi kusetjentiswe umtsanyelo kususa insila.

Nangabe uwasha imoto yakho, tsela emanti ebhakedeni lelincane uwashe ngawo ite iphelele. Imoto itsatsa emanti lamanyenti kakhuu nangabe utawucala kususa umhlaba ngeliphayiphi lemanti uphindze ukhiphe ngalo insipho. Loko kukwenta usebentise emanti budlabha.

Nawugezela ebhavini, lawo manti ungaphindze uwasebentise kutselela ingadzi yakho netjani. Bakhona labacabanga kutsi kusebentisa emanti logeze ngawo kubulala titjalo.

Ungaphindze uwonge emanti ngekuba nelithangi lekukhangetela emanti emvula longawasebentisa etintfweni letinyenti njengekuwasho timphahla. Nangabe ufake lithange kumele ube nemitsi loyisebentisako kuhlanta lamanti. Loko kutawunciphisa emagciwane langadala kugula.

Kwenta tintfo letingenhla kungasisita sive ekunciphiseni lenkinga lesibukene nayo yekweswelakala kwemanti. Asikhumbule kutsi emanti ayimphilo ngete saphila ngaphandle kwawo.

[Itsetfwe ku-*Isolezwe*, Ingci 2015, Likhasi 5]

SAMBA SESIGABA B: 10

SIGABA C: TAKHI NETIMISO TEKUSETJENTISWA KWELULWIMI**UMBUTO 3: SIKHANGISI**

Fundza lesikhangisi lesingentasi bese uphendvula imibuto letawulandzela.

ITHEKSTHI D

I-TISSUE OIL YENTA SIKHUMBA SISHELELE BUSUKU NEMINI.

- Itsambisa sikhumba lesomile.
- Yenta sikhumba sibe busheleleti njengesemntfwana.
- Labasebentisa yona bavuka babe basha sha.
- Iyasetjentiswa nangulabadvuna nebantfwana.
- Lilanga alidlaleli kulosebentisa i-Tissue Oil.
- Awekho emafutsa lengca i-Tissue Oil.

[Itsetfwe ku-True Love, Ingci 2013, Likhasi 11]

- 3.1 Sitsini sihloko salesikhangisi? (1)
- 3.2 Khetsa YINYE imphendvulo. Lenkhulumo lets, 'Lilanga alidlaleli kulosebentisa i-Tissue Oil' ishoni?
- A Lilanga alikushisi.
 B Lilanga alikulandzeli.
 C Lilanga alikukhanyisi.
 D Lilanga alikuvali. (1)

- 3.3 Khipha umusho lonenkhulomo leyimfundzisolite uwubhale phasi. (1)
- 3.4 Bhala ligama lenkapani leyenta iTissue Oil. (1)
- 3.5 Shano kutsi kungani kusetjentiswe ligama lelitsi, 'kushelela' kulesikhangisi. Bhala KUBILI. (2)
- 3.6 Kungani lokhangisako asebentise sicatsaniso imini nebusuku? Bhala KUBILI. (2)
- 3.7 Khipha sinongo lesisifaniso lesisetjentiswe kulesikhangisi lesingenhla utakhele wakho umusho ngaso. (2)
- [10]

UMBUTO 4: IKHATHUNI

Fundza lekhathuni bese uphendvula imibuto letawulandzela.

ITHEKSTHI E

[Itsetfwe ku-www.educationalcartoons.co.za]

- 4.1 Khetsa YINYE imphendvulo. Shano kutsi leligama lelidvwetjelwe enkhulumeni 1 lichazani?
- A Bantswana labangenaluvelo.
 B Bantswana labangenamandla.
 C Bantswana labangenabatali.
 D Bantswana labangenabasiti. (1)
- 4.2 Khokha ligama **lelisibaluli** kulomusho longentasi.
 'Dlamini, nje uyabacasha yini bantswana labahluphekako?' (1)
- 4.3 Tsatsa lelibito lelidvwetjelwe enkhulumeni 2 ulibhale ngeSiswati mbamba. (1)
- 4.4 Bhala kutsi lamagama ladvwetjelwe kulomusho longentasi akhombani.
 'Yebo, ngiyabacasha Mntungwa lomuhle.' (1)
- 4.5 Mehluko muni lokhona kulamadvodza lamabili ekubambeni tingilazi? (2)
- 4.6 Tsatsa libitombici lelisetjentiswe enkhulumeni 2 wakhe ngalo umusho. (2)
- 4.7 Khokha selulo sesento lesisetjentiswe kuleligama lelidvwetjelwe ngentasi bese usho kutsi sisho kwentani.
 'Bangisebentela kahle kakhulu njalo ngemaholide' (2)
[10]

UMBUTO 5: IPHROZI

- 5.1 Fundza letheksthi lelandzelako bese uphendvula imibuto letawulandzela.

ITHEKSTHI F

INHLUPHEKO YAKAKHUMALO

'Ibhasi yaMgubane isendleleni seyigudla intsaba ijambila legcwele tihlahla.' Kukhuluma Sipho emele uyise esiteshini. Emakhata ayababa. Phela Sipho abefunye we ngunina kuyomela uyise njengobe inyanga iphelile. Khumalo bekasebenta eBhabutini. Ngalesikhatsi Sipho alindzele uyise wabasa umlilo kutewucedza emakhata.

Wakhipha umetjiso walayitha wavutsa umlilo. Chamu ibhasi, kwehla uyise wamhlangabeta. Wambona alengisa tandla angakaphatsi lutfo. Lusizi lwakhe lwase lubhalwe ebuntini. Batsi basabukene beva umsindo ebhasini. 'Sasha siganga semlumbi.' Bagucuka bonkhe bahlahla emehlo. Sipho wagijima wayewetama kucima umlilo kepha kwangalungi. Kwachamuka umninipulasi wabuta kutsi usukaphi lomlilo. 'Ubaswe ngimi Mnumzane, bengitsi ngiyotsa ngobe ngiva emakhata.' Kuphendvula Sipho ashaywa luvalo. 'Kulungile, bakini batawubhadala kamatima ngalomonakalo. Ngifuna R900,00. Nakungasinjalo utawuhlala ejele.' Kusho umlumbi.

Khumalo wasibona siganga sisha, emehlo akhe agcwala tinyembeti acabanga inhlupheko labukene nayo. Wagcina ngekutsi, 'wangenta Sipho, ngilahlekelwe ngumsebenti, anginamali, angati kutsi sitawuphila ngani'.

[Itsetfwe encwadzini Umnotfo Welulwimi, Likhasi 41]

5.1.1 Khetsa YINYE imphendvulo. Nika umfutiselo walelibito lelidvwetjelwe kulomusho longentasi.

'... seyigudla intsaba iJambila legcwele tihlahla.'

- A Umganu
- B Umcombotsi
- C Umbhidvo
- D Umkhuhlane

(1)

5.1.2 Bhala mcondvofana waleligama lelidvwetjelwe kulomusho longentasi.

'Khumalo wasibona siganga sisha.'

(Bhala imphendvulo kuphela.)

(1)

5.1.3 Lungisa leligama lelidvwetjelwe kulomusho lolandzelako.

Batsi basabukene beva umsindo ebhasini.

(1)

5.1.4 Kuletheksthi lengehla khokha libitomfakela endzimeni yekucala ulibhale phasi.

(1)

5.1.5 Endzimeni yesibili khokha umusho lonesentakutsi uwubhale phasi bese uyasidvwebela.

(2)

5.1.6 Bhala lomusho longentasi ukhombe kuphika.

Khumalo bekasebenta eModise.

(2)

5.1.7 Sebentisa lesabito lesidvwetjelwe kulomusho longentasi emshweni lotakhele wona.

'Bagucuka bonkhe bahlahla emehlo.'

(2)

5.1.8 Lungisa ligama lelikubakaki libhaleke kahle kulomusho longentasi.

(Emehlo) akhe kwagcwala tinyembeti.

(2)

5.1.9 Nika luhlobo lwendlela yesento lolucuketfwe ngulemisho lelandzelako:

(a) Wakhipha umetjiso walayitha.


(b) Kusho umlumbi.

(2)

5.2 SITFOMBE

Fundza lesitfombe lesilandzelako bese uphendvula imibuto letawulandzela.

ITHEKSTHI G



[Itsetfwe ku-Move, Ingongoni 2011, Likhasi 18]

5.2.1 Khetsa YINYE imphendvulo. Bhala sinongo lesitfolakala efreyimini 1:

- A Sifanisongco
- B Sihabiso
- C Sifaniso
- D Simuntfutiso

(1)

5.2.2 Tsatsa sihlanganiso efreyimini 3 uhlanganise lemisho lelandzelako.

Bengipheke liphalishi. Ngifuna kudla lona.

(1)

5.2.3 Nika inchazelo yalesisho lesitsi, 'Alishisi likhipha inhlanti emantini.'

(2)

5.2.4 Efreyimini 1 tsatsa sandziso sesikhatsi, 'ekuseni', usisebentise emshweni lotakhele wona.

(2)

[20]

SAMBA SESIGABA C:	40
SAMBA SAKO KONKHE:	80